

佛教菩提道哲學專題

第6週 2020/04/10

菩薩、摩訶薩、被大乘鎧、大乘相

《大般若波羅蜜多經·第二會·三摩地品第十六》

爾時，具壽善現白佛言：「世尊！何等是菩薩摩訶薩大乘相？齊何當知菩薩摩訶薩發趣大乘？如是大乘從何處出？至何處住？如是大乘為何所住？誰復乘是大乘而出？」

佛告善現：「汝初所問『何等是菩薩摩訶薩大乘相？』者，善現！六波羅蜜多，是菩薩摩訶薩大乘相。云何為六？謂：布施波羅蜜多、淨戒波羅蜜多、安忍波羅蜜多、精進波羅蜜多、靜慮波羅蜜多、般若波羅蜜多。

善現！云何布施波羅蜜多？若菩薩摩訶薩，以一切智智相應作意，大悲為首，用無所得而為方便，自捨一切內外所有，亦勸他捨內外所有，持此善根，與一切有情同共迴向一切智智。善現！是為菩薩摩訶薩布施波羅蜜多。

善現！云何淨戒波羅蜜多？若菩薩摩訶薩，以一切智智相應作意，大悲為首，用無所得而為方便，自受持十善業道，亦勸他受持十善業道，持此善根，與一切有情同共迴向一切智智。善現！是為菩薩摩訶薩淨戒波羅蜜多。

善現！云何安忍波羅蜜多？若菩薩摩訶薩，以一切智智相應作意，大悲為首，用無所得而為方便，自具增上安忍，亦勸他具增上安忍，持此善根，與一切有情同共迴向一切智智。善現！是為菩薩摩訶薩安忍波羅蜜多。

善現！云何精進波羅蜜多？若菩薩摩訶薩，以一切智智相應作意，大悲為首，用無所得而為方便，自於五波羅蜜多勤修不捨，亦勸他於五波羅蜜多勤修不捨，持此善根，與一切有情同共迴向一切智智。善現！是為菩薩摩訶薩精進波羅蜜多。

善現！云何靜慮波羅蜜多？若菩薩摩訶薩，以一切智智相應作意，大悲為首，用無所得而為方便，自方便善巧入諸靜慮、無量、無色，終不隨彼勢力受生，亦能勸他方便善巧入諸靜慮、無量、無色，不隨彼定勢力受生，持此善根，與一切有情同共迴向一切智智。善現！是為菩薩摩訶薩靜慮波羅蜜多。

善現！云何般若波羅蜜多？若菩薩摩訶薩，以一切智智相應作意，大悲為首，用無所得而為方便，自如實觀察一切法性，於諸法性無取、無著，亦勸他如實觀察一切法性，於諸法性無取、無著，持此善根，與一切有情同共迴向一切智智。善現！是為菩薩摩訶薩般若波羅蜜多。善現！當知是為菩薩摩訶薩大乘相。

復次，善現！菩薩摩訶薩大乘相者，謂內空（adhyātma-śūnyatā）、外空（bahirdhā-śūnyatā）、內外空（adhyātma-bahirdhā-śūnyatā）、空空（śūnyatā-śūnyatā）、大空（mahā-śūnyatā）、勝義空（paramârtha-śūnyatā）、有為空（saṃskṛta-śūnyatā）、無為空（a-saṃskṛta-śūnyatā）、畢竟空（atyanta-śūnyatā）、無際空（an-avarâgra-śūnyatā）、散無散空（an-avakâra-śūnyatā）、本性空（prakṛti-śūnyatā）、自共相空（sva-lakṣaṇa-śūnyatā）、一切法空（sarva-dharma-śūnyatā）、不可得空（an-upalambha-śūnyatā）、無性空（a-bhāva-śūnyatā）、自性空（sva-bhāva-śūnyatā）、無性自性空（a-bhāva-sva-bhāva-śūnyatā）。

云何內空？內，謂：內法，即是眼、耳、鼻、舌、身、意。當知此中，眼由眼空，非常、非壞，乃至意由意空，非常、非壞。何以故？本性爾故。善現！是為內空。

云何外空？外，謂：外法，即是色、聲、香、味、觸、法。當知此中，色由色空，非常、非壞，乃至法由法空，非常、非壞。何以故？本性爾故。善現！是為外空。

云何內外空？內外，謂：內外法，即內六處及外六處。當知此中，內法由外法空，非常、非壞，外法由內法空，非常、非壞。何以故？本性爾故。善現！是為內外空。

云何空空？空，謂：一切法空，此空復由空空，非常、非壞。何以故？本性爾故。善現！是為空空。

云何大空？大，謂：十方，即東西南北四維上下。當知此中，東方由東方空，非常、非壞，乃至下方由下方空，非常、非壞。何以故？本性爾故。善現！是為大空。

云何勝義空？勝義，謂：涅槃。當知此中，涅槃由涅槃空，非常、非壞。何以故？本性爾故。善現！是為勝義空。

云何有為空？有為，謂：欲界、色界、無色界。當知此中，欲界由欲界空，非常、非壞，色、無色界由色、無色界空，非常、非壞。何以故？本性爾故。善現！是為有為空。

云何無為空？無為，謂：無生、無滅、無住、無異。當知此中，無為由無為空，非常、非壞。何以故？本性爾故。善現！是為無為空。

云何畢竟空？畢竟，謂：若法究竟不可得。當知此中，畢竟由畢竟空，非常、非壞。何以故？本性爾故。善現！是為畢竟空。

云何無際空？無際，謂：無初、後際可得。當知此中，無際由無際空，非常、非壞。何以故？本性爾故。善現！是為無際空。

云何散無散空？散，謂：有放、有棄、有捨可得。無散，謂：無放、無棄、無捨可得。當知此中，散無散由散無散空，非常、非壞。何以故？本性爾故。善現！是為散無散空。

云何本性空？本性，謂：若有為法性、若無為法性，如是一切皆非聲聞、獨覺、菩薩、如來所作，亦非餘所作故名本性。當知此中，本性由本性空，非常、非壞。何以故？本性爾故。善現！是為本性空。

云何自共相空？自相，謂：一切法自相，如變礙。是色自相，領納。是受自相，取像。是想自相，造作。是行自相，了別。是識自相，如是等若有為法自相，若無為法自相，是為自相。共相，謂：一切法共相，如苦。是有漏法共相，無常。是有為法共相，空、無我。是一切法共相，如是等有無量共相。當知此中，自共相由自共相空，非常、非壞。何以故？本性爾故。善現！是為自共相空。

云何一切法空？一切法，謂：五蘊、十二處、十八界，有色、無色，有見、無見，有對、無對，有漏、無漏，有為、無為，是為一切法。當知此中，一切法由一切法空，非常、非壞。何以故？本性爾故。善現！是為一切法空。

云何不可得空？不可得，謂：此中求諸法不可得。當知此中，不可得由不可得空，非常、非壞。何以故？本性爾故。善現！是為不可得空。

云何無性空？無性，謂：此中無少性可得。當知此中，無性由無性空，非常、非壞。何以故？本性爾故。善現！是為無性空。

云何自性空？自性，謂：諸法能和合自性。當知此中，自性由自性空，非常、非壞。何以故？本性爾故。善現！是為自性空。

云何無性自性空？無性自性，謂：諸法無能和合者性、有所和合自性。當知此中，無性自性由無性自性空，非常、非壞。何以故？本性爾故。善現！是為無性自性空。

復次，善現！有性由有性空，無性由無性空，自性由自性空，他性由他性空。

云何有性由有性空？有性，謂：有為法，此有性由有性空。

云何無性由無性空？無性，謂：無為法，此無性由無性空。

云何自性由自性空？謂：一切法皆自性空，此空非智所作，非見所作，亦非餘所作，是謂自性由自性空。

云何他性由他性空？謂：一切法若佛出世、若不出世，法住、法定、法性、法界、法平等性、法離生性、真如、不虛妄性、不變異性、實際，皆由他性故空，是謂他性由他性故空。

善現！當知是為菩薩摩訶薩大乘相。復次，善現！菩薩摩訶薩大乘相者，謂：無量、百、千無上微妙諸三摩地，即健行三摩地、寶印三摩地、師子遊戲三摩地、妙月三摩地、月幢相三摩地、一切法湧三摩地、觀頂三摩地、法界決定三摩地、決定幢相三摩地、金剛喻三摩地、入法印三摩地、放光無忘失三摩地、善立定王三摩地、放光三摩地、精進力三摩地、等湧三摩地、入一切言詞決定三摩地、等入增語三摩地、觀方三摩地、總持印三摩地、無忘失三摩地、諸法等趣海印三摩地、遍覆虛空三摩地、金剛輪三摩地、離塵三摩地、遍照三摩地、不眴三摩地、無相住三摩地、不思惟三摩地、無垢燈三摩地、無邊光三摩地、發光三摩地、普照三摩地、淨堅定三摩地、無垢光三摩地、發妙樂三摩地、電燈三摩地、無盡三摩地、具威光三摩地、離盡三摩地、無動三摩地、無瑕隙三摩地、日燈三摩地、淨月三摩地、淨光三摩地、發明三摩地、作所應作三摩地、智幢相三摩地、金剛鬘三摩地、住心三摩地、普明三摩地、善住三摩地、寶積三摩地、妙法印三摩地、一切法平等性三摩地、捨愛樂三摩地

入法頂三摩地、飄散三摩地、分別法句三摩地、平等字相三摩地、離文字相三摩地、斷所緣三摩地、無變異三摩地、無品類三摩地、無相行三摩地、離翳闇三摩地、具行三摩地、不變動三摩地、度境界三摩地、集一切功德三摩地、決定住三摩地、無心住三摩地、淨妙花三摩地、具覺支三摩地、無邊燈三摩地、無邊辯三摩地、無等等三摩地、超一切法三摩地、決判諸法三摩地、散疑網三摩地、無所住三摩地、一相莊嚴三摩地、引發行相三摩地、一行相三摩地、離行相三摩地、妙行相三摩地、達諸有底散壞三摩地、入施設語言三摩地、解脫音聲文字三摩地、炬熾然三摩地、嚴淨相三摩地、無標幟三摩地、具一切妙相三摩地、不熹一切苦樂三摩地、無盡行相三摩地、具陀羅尼三摩地、攝伏一切正性邪性三摩地、靜息一切違順三摩地、離憎愛三摩地、無垢明三摩地、具堅固三摩地、滿月淨光三摩地、大莊嚴三摩地、照一切世間三摩地、定平等性三摩地、有諍無諍平等理趣三摩地、無巢穴無標幟無愛樂三摩地、決定安住真如三摩地、離身穢惡三摩地、離語穢惡三摩地、離意穢惡三摩地、如虛空三摩地、無染著如虛空三摩地。如是等三摩地有無量、百、千，是為菩薩摩訶薩大乘相。

善現！云何名為健行三摩地？謂：若住此三摩地時，能受一切三摩地境，能辦無邊殊勝健行，能為一切等持導首，是故名為健行三摩地。

云何名為寶印三摩地？謂：此三摩地能印一切定，是故名為寶印三摩地。

云何名為師子遊戲三摩地？謂：若住此三摩地時，於諸勝定遊戲自在，是故名為師子遊戲三摩地。

云何名為妙月三摩地？謂：若住此三摩地時，如淨滿月普照諸定，是故名為妙月三摩地。

云何名為月幢相三摩地？謂：若住此三摩地時，普能住持諸定勝相，是故名為月幢相三摩地。

云何名為一切法湧三摩地？謂：若住此三摩地時，普能湧出一切勝定，是故名為一切法湧三摩地。

云何名為觀頂三摩地？謂：若住此三摩地時，普能觀察一切定頂，是故名為觀頂三摩地。

云何名為法界決定三摩地？謂：若住此三摩地時，能於法界決定照了，是故名為法界決定三摩地。

云何名為決定幢相三摩地？謂：若住此三摩地時，能決定持諸定幢相，是故名為決定幢相三摩地。

云何名為金剛喻三摩地？謂：若住此三摩地時，能摧諸定，非彼所伏，是故名為金剛喻三摩地。

云何名為入法印三摩地？謂：若住此三摩地時，普能證入一切法印，是故名為入法印三摩地。

云何名為放光無忘失三摩地？謂：若住此三摩地時，放勝定光，照有情類，令彼憶念曾所受法，是故名為放光無忘失三摩地。

云何名為善立定王三摩地？謂：若住此三摩地時，於諸定王善能建立，是故名為善立定王三摩地。

云何名為放光三摩地？謂：若住此三摩地時，於諸定光，普能開發，是故名為放光三摩地。

云何名為精進力三摩地？謂：若住此三摩地時，能發諸定精進勢力，是故名為精進力三摩地。

云何名為等涌三摩地？謂：若住此三摩地時，令諸等持，平等涌現，是故名為等涌三摩地。

云何名為入一切言詞決定三摩地？謂：若住此三摩地時，於諸言詞，決定悟入，是故名為入一切言詞決定三摩地。

云何名為等入增語三摩地？謂：若住此三摩地時，於諸定名，普能悟入訓釋理趣，是故名為等入增語三摩地。

云何名為觀方三摩地？謂：若住此三摩地時，於諸定方，普能觀照，是故名為觀方三摩地。

云何名為總持印三摩地？謂：若住此三摩地時，能總任持諸定妙印，是故名為總持印三摩地。

云何名為無忘失三摩地？謂：若住此三摩地時，於諸定相，皆無忘失，是故名為無忘失三摩地。

云何名為諸法等趣海印三摩地？謂：若住此三摩地時，令諸勝定等皆趣入，如大海印攝受眾流，是故名為諸法等趣海印三摩地。

云何名為遍覆虛空三摩地？謂：若住此三摩地時，於諸等持，遍能覆護，無所簡別如太虛空，是故名為遍覆虛空三摩地。

云何名為金剛輪三摩地？謂：若住此三摩地時，普能任持一切勝定，令不散壞，如金剛輪，是故名為金剛輪三摩地。

云何名為離塵三摩地？謂：若住此三摩地時，能滅一切煩惱纏垢，是故名為離塵三摩地。

云何名為遍照三摩地？謂：若住此三摩地時，遍照諸定，令其光顯，是故名為遍照三摩地。

云何名為不眴三摩地？謂：若住此三摩地時，更不希求餘定餘法，是故名為不眴三摩地。

云何名為無相住三摩地？謂：若住此三摩地時，不見諸定中有少法可住，是故名為無相住三摩地。

云何名為不思惟三摩地？謂：若住此三摩地時，所有下劣心、心所法，悉皆不轉，是故名為不思惟三摩地。

云何名為無垢燈三摩地？謂：若住此三摩地時，如持淨燈，照了諸定，是故名為無垢燈三摩地。

云何名為無邊光三摩地？謂：若住此三摩地時，能發大光，照無邊際，是故名為無邊光三摩地。

云何名為發光三摩地？謂：若住此等持無間，能發一切勝定光明，是故名為發光三摩地。

云何名為普照三摩地？謂：若得此等持無間，即能普照諸勝定門，是故名為普照三摩地。

云何名為淨堅定三摩地？謂：若住此三摩地時，得諸等持淨平等性，是故名為淨堅定三摩地。

云何名為無垢光三摩地？謂：若住此三摩地時，能普蠲除一切定垢，是故名為無垢光三摩地。

云何名為發妙樂三摩地？謂：若住此三摩地時，領受一切等持妙樂，是故名為發妙樂三摩地。

云何名為電燈三摩地？謂：若住此三摩地時，照諸等持，如電光焰，是故名為電燈三摩地。

云何名為無盡三摩地？謂：若住此三摩地時，引諸等持功德無盡，而不見彼盡不盡相，是故名為無盡三摩地。

云何名為具威光三摩地？謂：若住此三摩地時，於諸等持，威光獨盛，是故名為具威光三摩地。

云何名為離盡三摩地？謂：若住此三摩地時，見諸等持一切無盡，而不見有盡不盡相，是故名為離盡三摩地。

云何名為發明三摩地？謂：若住此三摩地時，令諸定門，發明普照，是故名為發明三摩地。

云何名為作所應作三摩地？謂：若住此三摩地時，辦諸等持所應作事，又令諸定所作事成，是故名為作所應作三摩地。

云何名為智幢相三摩地？謂：若住此三摩地時，見諸等持妙智幢相，是故名為智幢相三摩地。

云何名為金剛鬘三摩地？謂：若住此三摩地時，雖能通達一切法，而不見有通達相，是故名為金剛鬘三摩地。

云何名為住心三摩地？謂：若住此三摩地時，心不動搖，不轉、不照亦不損減，不念有心，是故名為住心三摩地。

云何名為普明三摩地？謂：若住此三摩地時，於諸定明，普能觀照，是故名為普明三摩地。

云何名為善住三摩地？謂：若住此三摩地時，於諸等持，善能安住，是故名為善住三摩地。

云何名為寶積三摩地？謂：若住此三摩地時，觀諸等持，皆如寶聚，是故名為寶積三摩地。

云何名為妙法印三摩地？謂：若住此三摩地時，能印諸等持，以無印印故，是故名為妙法印三摩地。

云何名為一切法平等性三摩地？謂：若住此三摩地時，不見有法離平等性，是故名為一切法平等性三摩地。

云何名為捨愛樂三摩地？謂：若住此三摩地時，於一切法，捨諸愛樂，是故名為捨愛樂三摩地。

云何名為入法頂三摩地？謂：若住此三摩地時，於一切法，能除闇障，亦於諸定能為上首，是故名為入法頂三摩地。

云何名為飄散三摩地？謂：若住此三摩地時，飄散一切定執、法執，是故名為飄散三摩地。

云何名為分別法句三摩地？謂：若住此三摩地時，善能分別諸定法句，是故名為分別法句三摩地。

云何名為平等字相三摩地？謂：若住此三摩地時，得諸等持平等字相，是故名為平等字相三摩地。

云何名為離文字相三摩地？謂：若住此三摩地時，於諸等持，不得一字，是故名為離文字相三摩地。

云何名為斷所緣三摩地？謂：若住此三摩地時，絕諸等持所緣境相，是故名為斷所緣三摩地。

云何名為無變異三摩地？謂：若住此三摩地時，不得諸法變異之相，是故名為無變異三摩地。

云何名為無品類三摩地？謂：若住此三摩地時，不見諸法品類別相，是故名為無品類三摩地。

云何名為無相行三摩地？謂：若住此三摩地時，於諸定相，都無所得，是故名為無相行三摩地。

云何名為離翳闇三摩地？謂：若住此三摩地時，諸定翳闇，無不除遣，是故名為離翳闇三摩地。

云何名為具行三摩地？謂：若住此三摩地時，於諸定行，都無見執，是故名為具行三摩地。

云何名為不變動三摩地？謂：若住此三摩地時，於諸等持，不見變動，是故名為不變動三摩地。

云何名為度境界三摩地？謂：若住此三摩地時，超諸等持所緣境界，是故名為度境界三摩地。

云何名為集一切功德三摩地？謂：若住此三摩地時，能集諸定所有功德，於一切法，而無集想，是故名為集一切功德三摩地。

云何名為決定住三摩地？謂：若住此三摩地時，於諸定心，雖決定住，而知其相了不可得，是故名為決定住三摩地。

云何名為無心住三摩地？謂：若住此三摩地時，心於諸定，無轉、無墮，是故名為無心住三摩地。

云何名為淨妙花三摩地？謂：若住此三摩地時，令諸等持，皆得清淨，嚴飾光顯猶如妙花，是故名為淨妙花三摩地。

云何名為具覺支三摩地？謂：若住此三摩地時，令一切定，修七覺支，速得圓滿，是故名為具覺支三摩地。

云何名為無邊燈三摩地？謂：若住此三摩地時，於一切法，皆能照了，譬如明燈，是故名為無邊燈三摩地。

云何名為無邊辯三摩地？謂：若住此三摩地時，於一切法，得無邊辯，是故名為無邊辯三摩地。

云何名為無等等三摩地？謂：若住此三摩地時，於諸等持，得平等性，亦令諸定成無等等，是故名為無等等三摩地。

云何名為超一切法三摩地？謂：若住此三摩地時，普能超度三界諸法，是故名為超一切法三摩地。

云何名為決判諸法三摩地？謂：若住此三摩地時，於諸勝定及一切法，能為有情如實決判，是故名為決判諸法三摩地。

云何名為散疑網三摩地？謂：若住此三摩地時，於諸等持及一切法，所有疑網，皆能除散，是故名為散疑網三摩地。

云何名為無所住三摩地？謂：若住此三摩地時，不見諸法有所住處，是故名為無所住三摩地。

云何名為一相莊嚴三摩地？謂：若住此三摩地時，不見諸法二相可取，是故名為一相莊嚴三摩地。

云何名為引發行相三摩地？謂：若住此三摩地時，於諸等持及一切法，雖能引發種種行相，而都不見能引發者，是故名為引發行相三摩地。

云何名為一行相三摩地？謂：若住此三摩地時，見諸等持，無二行相，是故名為一行相三摩地。

云何名為離行相三摩地？謂：若住此三摩地時，見諸等持都無行相，是故名為離行相三摩地。

云何名為妙行相三摩地？謂：若住此三摩地時，令諸等持，起妙行相，是故名為妙行相三摩地。

云何名為達諸有底散壞三摩地？謂：若住此三摩地時，於諸等持及一切法，得通達智，如實悟入，既得入已，於諸有法，通達散壞，令無所遺，是故名為達諸有底散壞三摩地。

云何名為入施設語言三摩地？謂：若住此三摩地時，悟入一切三摩地法，施設語言，無著、無礙，是故名為入施設語言三摩地。

云何名為解脫音聲文字三摩地？謂：若住此三摩地時，見諸等持解脫一切音聲文字，眾相寂滅，是故名為解脫音聲文字三摩地。

云何名為炬熾然三摩地？謂：若住此三摩地時，於諸等持，威光照曜，是故名為炬熾然三摩地。

云何名為嚴淨相三摩地？謂：若住此三摩地時，於諸等持，能嚴淨相，謂於諸相皆能除滅，是故名為嚴淨相三摩地。

云何名為無標幟三摩地？謂：若住此三摩地時，於諸等持，不見標幟，是故名為無標幟三摩地。

云何名為具一切妙相三摩地？謂：若住此三摩地時，諸定妙相，無不具足，是故名為具一切妙相三摩地。

云何名為不熹一切苦樂三摩地？謂：若住此三摩地時，於諸等持苦樂之相，不樂觀察，是故名為不熹一切苦樂三摩地。

云何名為無盡行相三摩地？謂：若住此三摩地時，不見諸定行相有盡，是故名為無盡行相三摩地。

云何名為具陀羅尼三摩地？謂：若住此三摩地時，能總任持諸定勝事，是故名為具陀羅尼三摩地。

云何名為攝伏一切正性邪性三摩地？謂：若住此三摩地時，於諸等持正性、邪性，攝伏諸見，皆令不起，是故名為攝伏一切正性邪性三摩地。

云何名為靜息一切違順三摩地？謂：若住此三摩地時，於諸等持及一切法，都不見有違順之相，是故名為靜息一切違順三摩地。

云何名為離憎愛三摩地？謂：若住此三摩地時，於諸等持及一切法，都不見有憎愛之相，是故名為離憎愛三摩地。

云何名為無垢明三摩地？謂：若住此三摩地時，於諸等持，都不見有明相、垢相，是故名為無垢明三摩地。

云何名為具堅固三摩地？謂：若住此三摩地時，令諸等持，皆得堅固，是故名為具堅固三摩地。

云何名為滿月淨光三摩地？謂：若住此三摩地時，令諸等持功德增益，如淨滿月光增海水，是故名為滿月淨光三摩地。

云何名為大莊嚴三摩地？謂：若住此三摩地時，令諸等持，成就種種微妙希有大莊嚴事，是故名為大莊嚴三摩地。

云何名為照一切世間三摩地？謂：若住此三摩地時，照諸等持及一切法，令有情類，皆得開曉，是故名為照一切世間三摩地。

云何名為定平等性三摩地？謂：若住此三摩地時，不見等持定散差別，是故名為定平等性三摩地。

云何名為有諍無諍平等理趣三摩地？謂：若住此三摩地時，不見諸法及一切定有諍、無諍。性相差別，是故名為有諍無諍平等理趣三摩地。

云何名為無巢穴無標幟無愛樂三摩地？謂：若住此三摩地時，破諸巢穴，捨諸標幟，斷諸愛樂，而無所執，是故名為無巢穴無標幟無愛樂三摩地。

云何名為決定安住真如三摩地？謂：若住此三摩地時，於諸等持及一切法，常不棄捨真如實相，是故名為決定安住真如三摩地。

云何名為離身穢惡三摩地？謂：若住此三摩地時，令諸等持破壞身見，是故名為離身穢惡三摩地。

云何名為離語穢惡三摩地？謂：若住此三摩地時，令諸等持壞語惡業，是故名為離語穢惡三摩地。

云何名為離意穢惡三摩地？謂：若住此三摩地時，令諸等持壞意惡業，是故名為離意穢惡三摩地。

云何名為如虛空三摩地？謂：若住此三摩地時，於諸有情，普能饒益，其心平等如太虛空，是故名為如虛空三摩地。

云何名為無染著如虛空三摩地？謂：若住此三摩地時，觀一切法都無所有，如淨虛空，無染、無著，是故名為無染著如虛空三摩地。

善現！如是等有無量、百、千微妙希有勝三摩地，當知是為菩薩摩訶薩大乘相。」